

LEKSYON 9

**PAANO MAKAAANGKON
SANG MALIPAYON
NGA PANIMALAY**



Ang Matun-an Mo Sa Sini nga Leksyon

**Magpangamuyo kag Magpangabudlay
Para sa Kaluwasan**

sang Imo Panimalay

**Magmaayo nga Kristohanon sa Inyo
Puloy-an**

**Magpangayo sing Kapatawaran sa Imo
nga Sayop**

Magmalipayon Ikaw

Pakabalaana ang Pag-asawahay

Pilia ang Kristohanon

Magmaayo Ikaw nga Ginikanan

**Tudloi ang Imo mga Kabataan sa Pag-
higugma sa Dios**

Higugmaa ang Imo Panimalay

Wala na sing labing bulahan pa nga butang sa sini nga kalibutan, kundi ang Kristohanon nga panimalay. Si Kristo ang pangulo sa sini nga panimalay. Ang Iya presensya nagapuno sa puloy-an sang kalipay, kalinong kag gugma. Ang Kristohanon nga panimalay amo ang palalipdan kag dalangpan batok sa unos sang sala kag kagubot sa palibot. Mahimo nimo ang imo puloy-an nga daw “langit” sa duta kon himuon nimo ang ginatudlo sang Ginuo sa Iya Pulong.

Buhata Ini

1. Ang imo puloy-an mangin “langit” sa duta kon ikaw
 - a) may nagakaigo nga kuwarta sa pagpatahum sini.
 - b) may madamo nga mga abyan nga nagaduaw.
 - k) nagasunod sa ginatudlo sang Pulong sang Dios.

Sabat: 1. k) nagasunod sa ginatudlo sang Pulong sang Dios.

Magpangamuyo kag Magpangabudlay Para sa Kaluwasan sang Imo Panimalay

Makapangamuyo ikaw nga may pagtuo bangod nga amo ini ang kabubot-on sang Dios. Indi lang magkaluya kon ang imo panimalay indi maluwas sa gilayon.

Magpadayon lang sa pagpangamuyo kay nahibaloan mo nga ang Dios nagasabat sang pangamuyo.

Magtuo kay Ginuong Jesus, kag maluwas ka, ikaw kag ang imo panimalay. Mga Binuhatan 16:31.

Buhata Ini

2. Kon ang iban nga katapo sang imo panimalay wala pa makabaton sa Ginuo, kinahanglan

.... a) magpadayon ikaw sa pagpangamuyo sa ila.

.... b) mag-untat ikaw sa Pagpangamuyo sa ila.

.... k) hunahunaon mo nga ang Dios indi magluwas sa ila.

3. Pangamuyoi karon ang tagsa ka katapo sang imo panimalay. Himoa nga kinabatasan ang pagpangamuyo para sa ila adlaw-adlaw.

Sabat: 2. a) magpadayon ikaw sa pagpangamuyo sa ila.

Magmaayo nga Kristohanon sa inyo Puloy-an

Mahapos lamang ang magpaka Kristohanon sa simbahan, apang ano nga sahi sang Kristohanon ikaw sa imo puloy-an?

Buhata Ini

4. Basaha ang Mga Taga Colosas 3 kag painoinoha kon paano nimo matuman ining mga pagtudlo sa imo panimalay.

Nagapasalamat bala ikaw sa ginbuhat sang imo asawa, ukon bana? sa bulig sang imo mga anak, ukon mga utod? sang mga sakripisyo sang mga ginikanan para sa imo?

Mahigugmaon bala ikaw ukon maiyayyahon? Masingki bala ikaw kag madali maakig ukon mapailubon kag mapinatawaron? Diktador ka bala ukon nagapamati ka man sa mga panghuna-huna sang iban? Matinahuron kag matinumanon bala ikaw sa imo mga ginikanan, ukon nagatuman lang sang imo gusto kag indi matinumanon?

Mabinuligon bala ikaw kag mahapos pangabayon? Ukon matamad? Nagakalipay bala ikaw sa pagbulig sa iban nga wala nagatamay ukon nagakumod? Madali lang bala ikaw masaklaw, ukon malipayon bala ikaw bisan magmalain pa ang mga butang sa imo palibot? Mahapos bala sa iban nga katapo sang panimalay ang pagpakig-upod sa imo sa sulod sang puloy-an?

Buhata Ini

5. Kon gusto nimo nga may malipayon ikaw nga panimalay, talupangda ang imo kakulangan kag pangayoa sa Ginuo ang Iya bulig agud magmadinaugon ka. Kon handa ikaw sa paghimo sang imo bahin, ang Ginuo magabulig sa imo.

Magpangayo sing kapatawaran sa Imo mga Sayop

Nagtudlo si Ginuong Jesus sa aton sa pagpangayo sing patawad sa aton mga ginsaypan. Indí kita handa sa paghimo sini, makabalabag ini sa aton pagpakighiusa sa Dios.

Gani kon nagadala ka sang imo dulot sa halaran, kag dira makadumdom ka nga ang imo utod may aligutgot sa imo, bayai dira ang imo dulot sa atubangan sang halaran, kag lakat ka; pasag-uli anay sa imo utod, kag ugaling kari ka kag maghalad sang imo dulot. Mateo 5:23, 24.



Mabudlay ang magsiling, “Ginakasubo ko nga nakahambal ako sing ~~in~~ pakit sa imo. Pa-sensyaha lang ako,” apang amo ini ang maayo nga paagi sa paghaw-as sang malain naton nga balatyagon agud magpabilin nga malipayon ang imo panimalay. Indí bala maayo ang imo ugali? Ang pagtalupangod sa imo mga sala kag ang pagpangayo sang bulig gikan sa imo hinigugmasa sa pagpangamuyo sa imo, isa ini ka daku nga tikang padulong sa kadalag-an.

Busa magtinuaray kamo sang inyo mga sala, kag magpangamuyoay kamo; agud nga magayo kamo. Santiago 5:16.

Buhata Ini

6. Magmalipayon ang imo panimalay kon ikaw

- a) magpangayo sing patawad sa mga makasalaklaw mo nga buhat sa bisan sin-o nga katapo sang panimalay.
- b) magpaabot nga magpangayo ang tagsatagsa sang imo pagpatawad.
- k) magpakita sa tanan nga ikaw ang makagagahum agod nga mahadlok sila sa imo..

7. Sauloha ang Santiago 5:16.

Sabat: 6. a) magpangayo sing patawad sa mga makasalaklaw mo nga buhat sa bisan sin-o nga katapo sang panimalay.

Magmalipayon Ikaw

Tuohi ang Dios kag dayawa Sia sa sabat sang imo pangamuyo bisan pa nga madulom ang tanan kag daw indi makita ang sabat.

■ Kay ang kalipay sang Ginuo among inyo kusog. Nehemias 8:10.

Indi ka magkaluya kon daw mabudlayan ikaw sa pagpugong sang imo pagpangakig ukon sa iban nga malain nimo nga batasan. Kay ang pagpanikasog mo sa pagdula sang malain nga batasan isa ka pagpamatuod sang imo gugma sa Ginuo. Nagabulig Sia sa imo pagtubo espiritu-

hanon. Mahinay bala ang imo pagtubo? Magtulok ka sa Dios kag indi sa imo kaugalingon kag matingala lang ikaw kon paano Niya malubad ang mga gumontang sa sulod sang imo panimalay. Ang Dios amo ang mahigugmaon mo nga Amay nga nagatatap sa imo.

Buhata Ini

8. Sauloha ang Nehemias 8:10.

Pagpakabalaana ang Pag-asawahay

Sa iban nga mga duog may naga puy-anay nga wala makasal. Kon ang tawo magKristohanon, gusto niya nga ibutang sa legal ang ila pag-asawahay. Sa sini nga paagi, magamaayo ang iya pagpamatuod sa palibot niya. Ginahatagan niya ang iya panimalay sang kasegurohan sa kasugoan sang banwa, kag nagatahud kay Ginuong Jesu-Kristo. Kon nagakinahanglan ikaw sang laygay nahanungod sa legal nga dukomento, magpakig-hambal sa imo pastor nahanungod sini. Igakalipay niya ang pagbulig sa imo sa iya masarangan.

Ang Pulong sang Ginuo batok sa bisan ano nga sari sang pakighilawas, nga gowa sa pag-asawahay. Ginadilian man sang Ginuo ang pagpanglahi sa iban nga babayi ukon lalaki.

Bulahan gid ang Kristohanon nga panimalay tungod sa isa ka butang. Ini amo nga ang bana kag ang asawa may pagsalig sa isa kag isa. Ila

nahibaloan nga ang tagsatagsa matutom sa hunahuna, pulong kag buhat. Samtang nagaisa sila sa pag-alagad sa Ginuo, nangin “diotay nga himaya” ang ila pag-upod. Hilway sila sa pagdaya, pangduhaduha, kaimon kag pagkadimaminatudon nga amo ang nagarumpag sang madamo nga panimalay.

Paghuptan sing dungganon sang tanan ang pag-asawahay. Mga Hebreo 13:4.

Apang maghimulat sang butang nga dungganon sa atubangan sang tanan nga tawo – maggawi kamo sing nagakaigo sa tunga sang mga Gentil, agud nga kon ginapakamalaut kamo nila, sila bangod sang inyo maayong mga buhat nga ila nakita maghima sang Dios sa adlaw sang pagduaw. Mga Taga Roma 12:17; 1 Pedro 2:12.

Buhata Ini

9. Ang maayo nga pagahimuon sang isa ka tawo agud may maayo sia nga pagpamatuod kag magpadayon ang pagpakamaayo sang Dios sa iya panimalay, amo ang
 - a) magpakasal sang legal sa wala pa magpuyo subong asawa kag bana.
 - b) magpuyo kaupod sang imo nga kahagugma sa wala pa kamo makasal para maseguro ninyo kon bagay kamo sa isa kag isa.
 - k) magpabilin nga dalaga ukon uli-tawo.

10. Magpangamuyo kamo nga pakamaayohon sang Dios ang inyo pag-asawahay kag nga ang Iya gugma magapabakod sang gugma ninyo sa isa kag isa. Magpangamuyo nga magmangin matuod kamo sa isa kag isa sa pulong, panghunahuna, kag sa buhat. Pangayoa sa Dios nga buligan Niya kamo sa pagsalig sa isa kag isa.

Sabat: a) magpakasal sang legal sa wala pa magpuyo subong asawa kag bana.

Pilia ang Kristohanon

Kon nagapakig-upod na ikaw sa indi Kristohanon, ang pagahimuon nimo amo ang pagpangamuyo kag pagtinguha nga madala nimo sia kay Kristo. Kinahanglan magmaminatud-on ikaw nga asawa ukon bana. Kag pasigahon nimo ang imo suga para sa Ginuo sa sulod sang imo nga panimalay. Apang kon dalaga ukon soltero pa ikaw, kag nagahunahuna sa pagpamana o pagpangasawa, seguroha nga Kristohanon gid ang imo pagapilion. Amo lamang ini ang paagi nga makaagum ikaw sang matuod nga pagkaisa kag paghidait sa imo panimalay.

Kon magpangasawa o magpamana ikaw gikan sa lain nga pagtulohan, permi lang kamo may palaligban. Paano kamo magbuyloganay sa pagtudlo sang inyo mga anak nahanungod sa pagtulohan? Paano ang pagtudlo nimo sa ila sang husto nga pag-alagad sa Ginuo?

Ginbaton na nimo si Kristo nga Agalon sang imo kabuhi. Kon ang imo bana ukon asawa indi gusto nga mag-alagad ka sa Iya, masalapuan ninyo nga nagasipak ang inyo dalan. Permi lang ikaw nabutang sa tungatunga: ang paghandum sa pagpahamuot kay Kristo sa tanan nga butang kag ang handum sa pagpahamuot sa imo ka-upod.

Subong nga Kristohanon, buot ka magpahamuot sa Dios. Buot ka nga pagagamiton niya, magtambong sa mga panimbahon, magpakig-hiusa sa iban nga mga Kristohanon kag magpakigbahin sa mga bulohaton sang simbahan. Buot ka nga may pagpangamuyo sa imo panimalay, may pagdayaw sa Dios kag pagbuylog sa pag-alagad sa Dios subong nga isa ka panimalay.

Wala sing gana ang di-linuwas nga bana ukon asawa sa sini nga mga bagay. Ginatak-an sila sa mga panimbahon. Kon mag-upod gani sia sa imo sa simbahan nagapaabot sia nga maupod man ikaw sa mga duog sang kalingawan nga iya ginakadtoan nga indi maayo para sa Kristohanon. Kon indi gani magakadto sia sa iya naluyagan nga kadtoan. Nagahatag ini sing kasubo sa inyo panimalay. Ang masubo pa gid, kay madamo nga mga Kristohanon ang nagtugot nga ang ila nga tiayon magpahilayo sa ila sa Ginuo.

Buot sang Dios nga may malipayon kamo nga panimalay. Indi Sia buot nga mahulog ikaw sa tugalbong ni Satanas. Nagapaandam ang Dios nga indi ikaw magpamana ukon magpangasawa sang indi tumuluo.

Dili kamo magpagota sing linibagon upod sa mga di-matinoohon kay ano bala ang pag-updanay sang pagkamatarung kag kala-utan? Ukon ano bala ang paghiambit sang kapawa sa kadudolman? 2 Corinto 6:14.

Buhata Ini

11. Ang pagpakasal sa isa nga di-Kristoha-
non
- a) isa ka maayo nga paagi sa pag-
daug sa iya sa Ginuo.
 - b) maayo man basta nagahigugma-
ay lamang ang duha.
 - k) isa ka paglapas sa sugo sang
Dios.

Sabat: 11. k) isa ka paglapas sa sugo sang
Dios.

Magmaayo Ikaw nga Ginikanan

Ang ginikanan may salabton sa Dios pag-
atipan sa ila kabataan. Ang amay, subong pa-
ngulo sang panimalay, dapat magtinguha sa pag-
hatag sang materyal kag espirituhanon nga kina-
hanglanon sang iya panimalay. Ang iloy dapat
man maghatag sang mapinalanggaon nga pag-
atipan nga ginakinahanglan sang mga kabataan.
Ang bulohaton sa iglesia wala nagahilway sa
katungdanan sang ginikanan sa ila panimalay.

Kon ang bisan sin-o wala nagasakdag sang
iya mga himata, labi na gid sang iya kauga-
lingon nga panimalay, napanghiwala niya
ang pagtuo kag malain pa sa di-matinuo-
hon. 1 Timoteo 5:8.

Buhata Ini

12. Ang isa ka amay nga nagapatumbaya sang iya panimalay agud makawali

.... a) nagapakita sang hanuot nga pag-alagad sa Dios.

.... b) nagapabaya sa katungdanan nga ginhatag sang Dios sa iya sa pag-atipan sang iya panimalay.

Sabat: 12. b) nagapabaya sa katungdanan nga ginhatag sang Dios sa iya sa pag-atipan sang iya panimalay.

Tudloi ang Imo mga Kabataan sa Paghigugma sa Dios

Kon tudloan nimo ang imo mga kabataan sa paghigugma sa Dios kag sa pagtuman sang Iya mga Pulong samtang magamay pa sila, ginluwas nimo sila kag ang imo kaugalingon sa madamo nga mga palaligban sa pagdalagku nila. Tipuna ang imo panimalay sa pagbasa sang Pulong sang Dios kag sa pagpangamuyo adlaw-adlaw. Hatagi sing bahin ang tagsatagsa. Magbuylog man kamo sa pagpasalamat sa Dios sang Iya bugay kag mga pagpakamaayo.

Magbuylog kamo sa pagkadto sa klase sa adlaw nga Domingo kag sa panimbahon. Tudloi sila sa paghatag sang ila kabuhi sa Dios samtang bata pa sila.

Samtang nagaisa kamo sa pagsimba kag sa pag-alagad sa Dios, ang Iya gugma nagapapagon sang inyo kaangtanan sa isa kag isa. Ginasi-

ling nga: “Ang panimalay nga nagabuylog sa pagpangamuyo may pagkaisa.”

Mga amay, dili ninyo pagpaakiga ang inyo mga anak, kundi sagura sila sa disiplina kag sa pagtudlo sang Ginuo. Mga Taga Efeso 6:4.

Buhata Ini

13. Isulat ang kulang nga mga tinaga sining hulubaton: “Ang panimalay nga nagabuylog sa..... may”

14. Kon ginikanan ikaw, pangamuyoi ang tagsatagsa nimo ka anak karon. Pangayoa sa Ginuo nga buligan Niya ikaw sa pagbulig sa ila. Magpangamuyo nga hatagan pa gid Niya ikaw sang pasensya kag paghangup sa imo mga anak.

Sabat: 13. pagpangamuyo; pagkaisa.

Higugmaa ang Imo Panimalay

“Ang Dios gugma.” Samtang nagatubo ang gugma sang Dios sa imo kabuhi, nagadugang man ang imo gugma sa imo panimalay. Kag samtang nagadugang ang inyo gugma sa sulod sang panimalay, nagamalipayon pa gid kamo.

Buhata Ini

15. Pangayoa sa Ginuo nga buligan Niya kamo nga maghigugmaanay pa gid sa sulod sang panimalay.

16. Basaha ang 1 Mga Taga Corinto 13 kag pangayoa sa Dios nga buligan niya ikaw nga mabutang sa buhat ini tanan sa imo panimalay.
17. Karon sulati ang imo "Rekord sang Bumolutho" para sa Leksyon 9.

PAGPAKILALA sang LEKSYON 10

Pagkatapos mo matun-an ang Leksyon 10, ang katapusan nga leksyon sang kurso nga "Ang Bag-o Mo Nga Kabuhi," mahimo na nimo mabaton ang matahum nga sertipiko gikan sa ICI. Paabota ining dugang nga padya.

Ang topiko sang Leksyon 10 amo "Ang Bag-o Mo Nga Kahilwayan." Matun-an nimo kon ano ang kahulogan sang pagkahilway kag kon sa ano ikaw ginhilway. Ang sabat sining mga pamangkot kag dugang pa gid nga malahalon nga mga impormasyon makita sa Leksyon 10. Tion na nga dapat magdugang ang imo ihibalo nahanungod sa "Bag-o Mo nga Kahilwayan."